

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON

KANTONALNI SUD U NOVOM TRAVNIKU

Broj: 51 0 Rs 224366 24 Rsž

Novi Travnik, 11.02.2025. godine

Kantonalni sud u Novom Travniku, u vijeću sastavljenim od sudija Denis Trifković, kao predsjednik vijeća, Senad Begović i Aida Pezer-Alić, kao članovi vijeća, u pravnoj stvari tužitelja B. T. iz D., ..., protiv tužene JU OŠ „Todor Dokić“, Derventa i JU OŠ „Nikola Tesla“, Derventa, radi: radni spor, vrijednost spora 17.900,00 KM, odlučujući po žalbi tužitelja podnesenoj protiv rješenja Općinskog suda u Travniku broj 51 0 Rs 224366 24 Rs od 03.07.2024. godine, u sjednici vijeća održanoj dana 11.02.2025. godine, donio je sljedeće:

RJEŠENJE

Žalba tužitelja se odbija kao neosnovana i rješenje Općinskog suda u Travniku broj 51 0 Rs 224366 24 Rs od 03.07.2024. godine se potvrđuje.

Obrazloženje

Prvostepenim rješenjem, Općinski sud u Travniku oglosio se stvarno nenadležnim za postupanje u ovoj pravnoj stvari, ukinuo sve provedene radnje i tužbu odbacio.

Protiv ove odluke prvostepenog suda tužitelj je u ostavljenom roku blagovremeno podnio žalbu. U žalbi navodi da podnosi pravni lijek u ovom postupku kako bi se kasnije obratio Ustavnom sudu BiH kao i Sudu za ljudska prava. Navodi da prvostepeni sud nije odlučivao u vijeću, te da Država Bosna i Hercegovina treba imati jedno pravosuđe jer je to element državnosti.

Pošto je ispitao pobijano rješenje u dijelu kojim se pobija žalbom, u granicama navedenim u žalbi i po službenoj dužnosti, sukladno članku 221. Zakona o parničnom postupku („Službene novine F BiH“, broj: 53/03, 73/05, 19/06 i 98/15, a u daljem tekstu ZPP), drugostepeni sud je zaključio sljedeće:

Žalba nije osnovana.

Neosnovani su žalbeni navodi tužitelja da prvostepeni sud nije pravilno odlučio kada se oglosio stvarno nenadležnim za postupanje u ovoj pravnoj stvari. Naime, iz podnesene tužbe je vidljivo da i tužitelj i tuženi imaju prebivalište odnosno sjedište na području Republike Srpske. Odredba člana 2. Zakona o sudovima u Federaciji BiH (Sl. novine F BiH broj 38/05, 22/06, 63/10, 72/10, 7/13, 52/14 i 85/21) propisuje da sudovi provode sudsku vlast u Federaciji Bosne i Hercegovine. Član 16. ovog Zakona propisuje da se općinski sudovi osnivaju za područje jedne ili više općina u kantonu, a članom 22 je propisano da je Općinski sud u Travniku nadležan za područje općine Travnik. Nadalje član 27. Zakona o parničnom postupku propisuje da sudovi sude u

granicama svoje stvarne nadležnosti određene ovim ili drugim zakonom Federacije BiH, odnosno zakonom Kantona, a prema članu 17. istog Zakona, sud tokom cijelog postupka po službenoj dužnosti pazi na svoju stvarnu nadležnost, dok je članom 40 istog Zakona propisano da ako je u sporu iz radnog odnosa tužilac zaposlenik, za suđenje je nadležan, pored suda koji je opće mjesno nadležan za tuženog, i sud na čijem se području rad obavlja ili se obavljao, odnosno sud na čijem bi se području rad morao obavljati, te sud na čijem je području zasnovan radni odnos. Iz naprijed navedenih zakonskih odredbi proizilazi da Općinski sud u Travniku nije nadležan da postupi po tužbi tužitelja koja je podnesena dana 08.05.2024. godine, te je u ovom slučaju pravilno odlučio prvostepeni sud kada se oglasio stvarno nenadležnim, ukinuo provedene radnje i tužbu tužitelja odbacio.

Zbog svega naprijed navedenog, ovaj sud je primjenom odredbi članka 235. stav 2. Zakona o parničnom postupku F BiH, žalbu odbio kao neosnovanu.

Predsjednik vijeća
Denis Trifković